

蘭

汀

存

藁

梁北郭集卷

嶺海之南博望出焉不獨珠璣玳瑁水
銀丹砂已也其人物文章繪墨尤足重
當時而名後世予性嗜奇自入嶺表以
來列徼之外山翁海客有談南州諸島
嶼類事者輒傾聽之一日子同年養白
鵠君示予梁北郭蘭汀詩集則歎曰有

是哉有是哉夫粵故多材地也崑丘玄
圃積玉相照景山鄧林凡木不植觀於
比部信然哉明年予遊京師京師諸縉
紳就予索比部集甚衆予無以應之歸
以語其子予因謂比部雄才其文章必
尤有可觀者取而校之其文沉鬱古雅
有深長思雖馳騁變幻不閑一律道不

說聖賢讀之有可嗜之味其必重當時而名後世無疑也或曰以比部之才當不止此昔唐杜牧敘李賀文曰使賀且未死少加以理奴僕命騷可也予曰不然李元賓雖不永年不甚遠於楊子雲且夫用功深者收名遠比部沉潛六籍養志羅浮滄嶼間已久其所得固鉅昌

黎有言凡百物朝夕見者人皆不注視也及其所珍愛必索而欲得之今觀比部集京師就予索者甚衆奚啻珠璣玳瑁水銀丹砂云爾哉集成詩與文凡若干卷中翰浮山梁君比部故所厚結社友也援筆書之予因以語同年華溪郭君東水許君華溪君曰茲集藉梓以傳

俛蘭汀君壽人世不朽予同年責也東
水君曰比部性行醇篤不獨工文藝即
文藝殆不止此蓋逸者多矣是不可以
不傳因命予敘其簡端

嘉靖乙丑夏五月既望

賜進士出身中憲大夫廣西提刑按察
司副使昌江曹天祐撰

蘭汀梁公傳

梁有譽字公實順德桂林乾涖鄉人父世驃御史有
譽秀穎日誦數千言長益湛思百氏以嘉靖庚戌進
士授刑部主事是時諸郎李攀龍徐中行王世貞宗
臣舍人吳國倫山人謝榛結社為聲詩有譽在社中
業先成衆稱七才子時嚴嵩柄國其子世蕃欲親有
譽有譽耻為褻押遂謝病歸卒年三十六著有北部
集弟有貞綿州守亦以詩名

古番郭棐撰 光祿寺卿

紹震曰予兒輩時侍先國博曰今海內競尚比部詩
予猶謂其平反治獄面斥權奸非古大臣曷若
此追震閱諸史志喜益信然書於篇末使讀公
詩者知公才重益知德重

梁比部傳

嶺南在國初稱五先生詩嘉靖中盖有梁比部云梁比部者諱有譽字公實順德乾涿人也父世驃以進士為御史轉福建按察僉事有風憲名公實質穎貌古童時日誦數千言長益湛思博覈自六經以逮百氏外家小史靡不研究弱冠補博士弟子員猷訓詁括帖語與余及陳紹文梁雲龍吳旦黎民表陳冕黎民裏梁孜黎民懷梁柱臣講業於黃先生所以古詩文共相磨切尤砥礪行誼海內學士大夫往往誦余

嶺南詩癸卯公實舉於鄉庚戌成進士當銓注輒稱
病後期乃授比部郎朝夕曹署明清單辭審視極拳
大司寇以下咸重之貴臣以論死下獄雖不貸於
法意悲憐之為之洗沐左右皆感慨泣下獄中一囚
為一權力者所惡當公實亭謫時欲其文致成獄竟
不從而寬釋之邊人少時被虜入漠逮長奔歸偵者
得之以為間諜訊得其情竟宥其死治獄務平反文
無害省中稱長者居曹日無事得以博綜邃學多所
譏著求當於古作者不屑為今人詩請沐輒從謝山

人榛宗考功臣吳舍人國倫同舍郎李攀龍王世貞
徐中行唱和為樂都人無不標目七子為旅食三年
蕭然一室歛避權貴無所造謁袁州當國建安為冢
宰聞其才子計致門下遜謝不遑居比部歲餘即上
疏謝病歸奉母太孺人婆婆家園課兩弟有兆有貞
學皆成三梁蓋競爽矣構拙清樓以居左右惟太史
公書杜少陵集扃戶吟哦罕通賓客繡衣直指郡國
二千石諸請頌功德者恒以病辭郡中少年伺其閒
燕駕逼出遊終不得一幸臨況也脩復粵山舊社招

選故人相與發憤千古之事見余南粵賦泰關銘任
器城趙陀墓諸篇喟然曰吾黨狂簡亦斐而成章矣
於是作詠懷十五詩杜中人自以為不及也陳紹文
黎民表梁攷與公實游白雲蒲澗巾舄所臨翱翔八
極所賦有一死生齊物我意已而遣書約余遊羅浮
曰丈夫生當龍蠖豈能局促效轅下駒上世之士蜚
遡雲霞覽輝千里胡輓近世以獵纓黻組刺肥策堅
之為能也天下健者已目覩矣孰使子骯髒而倚門
為朱明之天將茅焉夫山林臯壤文藻之淵府也

足下能有意乎時余隱西樵不克偕公實東行未至
羅浮而返竟卒年三十六有比部集八卷行於世子
逢登郡學諸生世其家

歐大任曰柱下有云君子得其時則駕不得其時則
蓬累而行公實一仕即已豈卑歟蓬累為名高乎彼
其學無所不窺直以屬書離辭指事類情成一家言
樹不朽之聞於當世得以千古在前將旦暮遇之其
生也有涯其知也無涯孰能以靈光太玄為子雲文
考恨我公實雅不欲名然名者寔之賓也願今海內

競人知梁比部矣

奉政大夫虞衡清吏司郎中友人楨伯歐大任頓首
拜譔

附錄

明故承直郎刑部山西清吏司主事

梁君公實墓表

公實爲諸生卽名能歌詩傾嶺南矣已
成進士夔中郎又傾燕中人而居恒不
自得鬱鬱思歸補尚書刑部郎間與其
同舍郎李攀龍王世貞游乃稍自愉快

自世故有人哉而郎宗臣已忝爲吏部
休澣輒一來俄而郎徐中行來中行故
嘗與公實遊南太學深相結者也以是
日相與切劘古文辭甚歡而一旦念其
太夫人竟移病滿三月上書請告歸公
實時聲愈籍甚當徙郎吏部吏部亦當
推擇嶺南郎一人以風公實且止者公

實笑曰吾自欲歸豈以刑部少之故而
一吏部能縻我哉竟去弗願至濟上而
貽百韻詩攀龍輦爲別百韻節古有杜
甫氏而外不恒見也而文甚工旣歸乃
杜門度圖史丹青彝鼎之類一小閣艸
木竹石環之而身吟誦其間囂囂然不
屑也郡國大吏雅慕公實干旄門相踵

公實則以一蒼頭謝絕不任客鄉里統
袴子跡絕不相聞而潦倒書生挾冊剝
琢則尋覈出剗延食之矣服公實所最
善者攀龍輩當其在京師武昌吳國倫
最後定交而謝榛以布衣故公實亦間
游從其於鄉師事故黃文裕公佐而友
黎戶部民表當與民表約遊羅浮山觀

滄海日出沒探勾漏令丹鼎廢幾其人
一遇而屬海颶作不可以舟乃止宿田
舍者三夕颶益甚山木盡拔道爲徙而
公實亦意盡乃賦詩而歸是時屬寒疾
中湊矣歸而疾大作遂不起年僅三十
有六也公實以念太夫人故棄其官萬
里歸養而竟先太夫人以歿盡益謝棄

交遊期以歲月窮古作者之蘊而卷若
不觸手聿不受瀋庭卉木弗及新以死
嗚呼何以歿也公實所爲集若干卷具
在取其上駟而擬古作者無大愧其下
駟亦足以忝夫後歿者卽公實不死也
記之葬中從公實遊間過一肉不能再
盥旣復過具鰕菜不能肉以爲恒青衫

沓拖其當繡處時嚙殘則縵以絲襪之
而問其家世故嘗貴爲諸生日以意氣
耗其數百金不顧詰之則笑而指其腹
曰是豈任肉者公實又性不好食酒事
太夫人篤至夔夔齋慄與諸弟季友愛
甚昵卽獨飯飯弗甘也又奢飭於言行
不寢言諾取予一介不苟自吾黨之工

於詩不乏而其爲人毋工於公實者公
實好言數又能相嘗一夕謂子相曰子
甚賢而戩身奈何已又謂余曰惜乎子
之不得志於羣也子而年疇能跡子武
乃又黥然而歎曰吾先二子往其誰爲
驗者蓋公實歿之六年而宗臣亦年三
十六以歿又十五年而余尚在顧且老

無所成因公實弟有貞之請而爲之表
其墓曰明珠珊瑚若然夜光粵之南在
在藏而孰與夫公實之骨之藏公實梁
氏諱有譽別號蘭汀其父僉事公世驃
爲南臺察以諫稱太夫人張氏娶於周
氏有子一人逢登郡學諸生孫二人尚
幼餘詳誌中

賜進士第嘉議大夫都察院右副都御

史吳郡王世貞撰

蘭汀存藁卷之一

五言古

雜詩

圓象無停晷四序迭相循曄曄春華敷歛忽委
埃塵候蟲善審時鳴鳥常伺晨如何建名士遲
暮多苦辛衝波鮮安舟岐路恒摧輪順風響易
遠却行難及人鐘鼎鐫峻功竹帛垂逸民靜操
雖殊域德業終同倫慷慨感中情高駕良可遵

又

我行彼中野靡靡令心憂四顧漭無人但見林
與丘高臺多悲風滄海轉洪流走獸駭叢奔號
鳥求匹儔顧茲震心魄欲去將何求古來賢達
人高視隘九州若士處大荒邈然誰能侔阮生
蓬池土於世若雲浮嗟哉愚蒙者睠戀區中謀
雍門泣孟嘗牛山悲爽鳩聞彼代謝理泄物恒
怨尤黃鵠摩霄舉騰蛇乘霧游斥鴳爾何陋枋
榆徒啾啾知自有大小達觀德彌優

鵲懷

玉露泣庭柯。鵲思悠哉。紛輕條戢。柔風密蔭垂。
層雲蟋蟀鳴前除。鴻雁自成羣。悼往憂無端。感
來緒難分。繁詞將焉陳。新知詎相聞。手結芙蓉
佩。佇立清江濱。欲奏清商調。長空零泰氛。

空庭木葉下。薤簟新涼歸。纖絳屏。麝篝綸縞授。
寒衣火流桂。將歇霜至蕙已微。信矣感物化。願
言捐塵機。流塵生綺疏。懷疴臥虛帷。引睇碧雲
盡。攬茲明月輝。賞心非徒然。悠悠寄金徽。

夕霽涼氣發曲房藹餘清金風被蘭茝白露浩
已盈密林謝陽彩叢薄隕芳榮迅商無緩調征
鴻懷苦聲物候旣易感神理固難名漢陰甘灌
園鹿門事躬耕金張逐丹轂王貢影華纓由來
事不同各以性自營伊予秉微尚恬曠諧風情
枉下明守雌漆園持達生緬懷昔人訓煩囂祗
自驚

虞卿

列國亂無象說客競馳軼虞卿信豪舉躡躡售

奇術藉藉入趙來英風孰能匹高談析世紛衆
辨歛如室見齊功莫當構秦慮何密始獲雙壁
甌終居一城逸誰悟論縱智詎悔歸梁失節高
棄相年書著窮愁日嗟哉濁世士徇時樹名實
榮臻朝享鼎機伏暮塗鑽何如舍之去名成功
亦畢寄謝後世人鑒觀存簡帙

詠馨

製因無句巧質從泗水旁象物還同矩論音本
協商治成觀獸舞聲起應鸞翔招僊鳴漢代爲

靈鑄魯堂鴻毛說本誕石室辨難詳唯有升歌
際能爲衆樂綱

送傳山人遊羅浮

僊山矗遐嶠縕奇信靈造晻靄蹴重溟巍峩冠
窮昊陰室引陽輝霧谷通霞島玄溜澤難枯炎
林蓋還早故鼎無畱丹煑石有遺老神境誰能
躋玄蹤爾方討秘檢洞中尋塵踪雲外掃陟霄
舉若華憑崖掇朱艸吹萬固不同得一以爲好
嗤彼蜉蝣士夸毗喪其寶何當榮茅龍吸景滌

幽抱

同傳木虛黎惟敬遊白雲寺

拂駕凌松梁捫蘿依化城望窮飛鳥前殿瞰翔
鵬平蜿蜒峰相拒潏潏海東傾乘危悵有閼耽
寂欣寡營良辰值秋期霧罷天宇晶素想挹逸
風玄辨觸深情八解云無端六喻本來精真如
風締念妙覺願投誠光閃金輪湧心動法鼓鳴
七燈韜晝焰二鼠祛夕驚浮歡空聚沫沉照固
無羸業以清淨勝理由冲寂行靈氛欲有訊相

從究無生

謁張丞相祠

開元治平日英賢恣游衍夫君匡屯器憂國持
先見詎慙伊呂科實冠東南彥朝直承明廬夕
下金華殿楚臣傷江楓漢女悲團扇而君復何
爲含情賦海燕玉泉一以閉微微市朝變橈櫓
亘中天長蛇屺畿甸金根入蜀年空餘淚如霰
我本慷慨士懷古歲方晏野烟綠歷起祠樹何
葱蒨攀杜寄芳情掇蘋羞野薦高芬誰復嗣舊

葉遙奔箭唯留千載名來哲同興羨

登除州城樓北望

朔風吹遊子寒城儵以眺乘高勢嶽峯獨客情
窈窕皇州在何處雙闕峙天表中原割霜雪星
日盪昏曉雲氣莽空闊一覽齊魯小敗壁剝枯
蘚土壤聚寒鳥北有古戰場落日行人少跡豈
陳項餘闕想晉宋藐王霸代淪踊今古誰能了
濁世事豪舉轂擊咽爭擾姪彼狹獮子原澤徒
劉勦西北風塵昏閃閃飛白旄萬金購謀士千

金購駿褭丈夫立功勳無使殷憂繞

濟上太白樓作

天寒霜雪繁日沒城上樓樓中繭繆人玉立橫
清秋金龜換美酒醉脫鸛鵲裘玩弄青玉塵長
揖謝王侯我來千載後萬壑風颼颼聞昔有丹
鳳不與凡鳥儔朝食玉山禾夕宿崑崙丘
將獻誰鳴聲鏘琳球始知空田雀飲啄徒啁啾
營營蚩青蠅楚楚歎蜉蝣請看黃河水滔滔萬

古流

送傅木虛返閩中

遠遊返舊山。武夷何巘嶮。鑿戶印壁峭。褰蘿歷
竇深。浮雲足擬志。澄淵可比心。誰言鮮歡娛。丘
中有鳴琴。誰言巖處劬。桂樹有清陰。玉茹供晨
食。祥風披夕襟。隴泉多異脉。谷鳥多殊音。嗟哉
還山人。冲夷難具尋。班麟倘可馭。遲爾羅浮岑。

又

瑤壇蘊靈符。十秘何紛贖。玉洞憶僊言。千歲今
始謫。天縻紫烟橫。地乳玄竅開。驂鸞忽履漢。吸

景盪精魄欲探冷暖池終訪金銀宅何事呼林
央非必冷冰碧暫憇倏以歸居然霄漢隔願從
九僊隱愧無三鳥翮何以表不忘歲晚松下石

遊僊

九州非我鄉撰念凌蓬瀛騰蓋懸圃臺投轡天
墉城紫府五香馥丹丘四照榮班麟何天矯青
鳳來相迎道逢王子喬手翳芙蓉旌靈風襲霓
裳邀我謁瑤京天帝坐叢霄羣真列兩楹羽節
自飄揚衆樂鏘然鳴授我飛龜訣錫我玉室名

渴漱沆瀣漿饑餌瑤樹英形思入玄道在豈
求羸流覽神區盡逍遙雲翮輕棗花千樹結桃
核萬年成海水揚塵竭天衣拂石平祈年本無
分望仙徒自營寄謝樊籠士那知遺世情

結客少年場

宛洛富奇節荆魏重才雄玉軸千金劍錦勒五
花驄朝馳下蔡北夕過上蘭東朱家曾見待劇
孟暗相通能使石飲羽還驚日貫虹身狗一朝
諾心期萬里功交河冰雪合天山烽火紅骨都

躡絕漠谷蠡入雲中結交思報國揮袂遠從戎
旌拂星芒落營開月暈空廓氛澄瀚海摧枯卷
朔風日出事擒敵歸來還射熊勇冠嫖姚幕勳
將定遠同欣當漢道盛行令運窮其就長安
邸待拜未央宮

黃司馬青泛軒

達人慕恬寂開軒負西郭芊綿引蕙田逶迤通
菌閣積芳集隆墀耽勝控遙壑藜氣通幽洞湖
光耿華薄青桐帶露疎翠羽衝花落蜃月鏡疎

櫺鵬雲冠虛幕真筌一以契琴書聊爾託鶴性
在烟霞鳳想存寥廓卽此願深棲陋彼郊居作

遊白雲寺

崇岫控越徼巍鎮峙郊甸峯崔嵬劫餘遘邐百
里見疎嶺何岑峭陽林鬱蒼蒨峻擬元天平俯
闕海日炫化城依層顛拂榮陟遙峴逢槎舊術
迷遭石新磴轉始至嵐陰豁暫息厓光顯露翳
若木莖風墮曇花片鳥啼谷互畲竹亞露猶泫
冲襟挹恬寂素想協遊衍靜惟迦葉智默遡龍

樹辨十喻總歸空六塵原不眩清朝意葉凋縞
夜心蓮現歲月紛逋馳棟宇幾遷變鶴往臺草
荒龍去井泉淺刻桷鼯鼠啼雕梁蛛網罥感物
置安排看雲悟舒卷結桂緒方遙攀蘿情莫展
景協賞爲美慮澹機自遣願總塵外轡謝此區
中戀

雜興

長安繁盛地甲第盡王侯珠履三千客金鋪十
二樓向晚歌鐘歇楊花起暮愁

鳴輶三輔客，挾彈五陵兒。報讎捐性命，殉國感
恩私。鹿塞烟塵合，何時
皮

送皇甫司勳謫開州

重淵產明璣，圓蘊奇璞君。子抗高誼信矣邁，
前躅摘辭燦國華。矯迹薦朝祿，淒風倏以飄。江
海變涼燠，空抱長沙悲。誰知郢人曲，茲焉總柔
轡。謁帝際明淑，魏闕承嘉惠。漢畿行佐牧，我有
盈樽酒。將子眺平陸，亭皋雲漸繁。河橋艸猶綠，
客塗履澶淵。臨流想濠濮，紆組歎徒勞。川原曠

英矚鄒枚列彤庭班楊侍華轂淫滯非所嗟宜
室行當復辰哉不可違清微幸自勗

五子詩

謝山人榛

矯矯被褐者江海自淪跡貧賤心所安顧領豈
摧抑用拙不求羸憂在騷雅熄窮來抱影居澹
詞蘊古色耿耿烈士心更著排難力恩銜越石
徒友道不荆棘恥貸監河粟甘從於陵食俛首
問妻子汝胡饑寒逼蹈海邇何人長嘯吾自得

富貴與榮名松菌固殊域燕石誠可嗤口珠盡
堪盡今古自一時鴻冥詎能弋

李中郎攀龍

大雅日已遠斯文競馳騫如何舍周鼎渙濁寶
康輓李生奮東海深湛託毫素棄世吾不爲榮
華吾不慕智用修綆級道由斲輪悟荒哉千載
心希聲在韶護刻商雜流徵衆耳信驚怖悠悠
復何言耶鄆踈其步浮沉將安之歲月不我顧
漢署共遨遊相期保中路璫佩紛偃蹇美人恐

遲暮八極自揮斥先民有遺度

徐比部中行

徐子負逸氣本自吳會奇邂逅協心許在昔未
遇時夙有淦霰情空抱世網悲揆余秉微尚泔
魚傷暮知握手自高吟一一金石辭賦客盡傾
倒珠光炫陸離詞園豈浪名作者見於斯立言
多苦心河清詎可期荃蕙化爲茅敝詞欲訴誰
騷乘賦已遠執戟志仍疲感彼同懷人愧無絃
佩貽勉哉體明德歲暮良不欺

宗考功臣

吏部慷慨人早晚耽著作所得皆經奇鬱鬱濟
世畧高視凌千載詞賦悼寂寞結藻燦國章著
論麗丹雘感時賦長楊菁華歎昭燭燭龍耀天
街蔀屋徒螢爝復古力何雄憐才意不薄末俗
振風騷平生重然諾莫逆今昔希詞盟欣有託
古來賢達士道在從龍夔瞻彼肅肅羽萬里翔
寥廓邴生宦業微懷恩向丘壑

王員外世貞

籍甚天下士王生名日振玄成有世業江左挺
斯人早窺竹素園賦賦楊馬倫新篇扣哀玉激
烈叱鬼神酒後雅吳詠俠氣凌高旻傲睨天地
間誰知肝膽親詞人久衰謝栢梁徒埃塵生也
抗高義斯道不緇磷鼎鉉期俊功揚聲天路津
豈學蓬蒿子白首徒苦辛余慚梧臺石君邁連
城珍用舍固殊轍感贈以書紳

就芝館爲潘少承賦

靈艸生幽谷無風還有香雲霞九華發露挹六

英芳褰衣往撿之迢迢雲路長願傍銅池側持
以瑞明王

蘭汀存藁卷之二

梁有譽著

歸自燕都貽諸弟

束髮屏丘壑吟諷百氏書
飲河期知足擇木不願餘
中歲出干祿幸侍承明廬
才非張廷尉尺簡日夕劬
負病蒙主恩解組返里閭
是時秋冬交草木亦扶疎
登堂展言讌酌醴復烹魚
奈何三載睽今喜奉潘與短
劒尚管蒯被褐無完裾
相顧驚終宴胡乃賦歸與
長歎思古人拙宦寧

獨予對珪玆袂邈瓶粟常晏如貴或輕沙礫賤
或重璠璵况茲蹇劣質豈希萬石儲物理互榮
謝天運有盈虛北山足芝朮歲晏聊荷鋤

詠懷

心星轉坤維芳榮遽銷謝玄蟬號樹間蟋蟀吟
幽榭商飈蕩陵茗物性隨時化瞻彼孤飛鴻遊
戲清瀾下霜霰旣以違曖藻何雍暇微禽尚有
適而我獨悲吒志士惜流光哀歌達長夜愧無
魯陽德何以迴羲駕

明月鑒重幃涼風吹綺疏佳人揚清謳顧影傷
離居昔別黃鳥鳴倏忽秋蘭舒繁華不再至歡
樂寧倩餘迢迢牽牛星萬古恒不渝所思杳天
末日夕增煩吁秦女善鳴箏趙女亦吹竽箏箏
豈不哀不如琴瑟娛織縑常苦遲織素常苦劬
嗟哉織作勤淚下沾羅襦

林居窺衡度代謝良悠悠玄化豈不仁物情各
恩讎怨生豈必微倚伏難瞬休尺坂能摧輪積
羽自沉舟衝波激宣房起自涓涓流螢燭不見

滅栢梁遂成丘蓼虫習忘返桂蠹昧淹留所以
達士懷委運復何求壺丘說持後商容明守柔
道喪邈中古何以銷我憂

楚王稱令尹樊姬笑非才穰侯擅關中畏見客
子來咄咄婦人者忠懷良可哀相國食重祿日
夕伏嫌猜王稽車中士談鋒豈藉媒惜哉智苦
遲窺關終見擢千秋秦人居函谷空崔嵬霸圖
與詭謀倏忽成黃埃

阮生歎廣武陶子詠荆軻豈知達士懷感慨更

繁多飲酣匪甘放身窶匪術踈冥鴻游四海所
畏在虞羅高車與駟馬不如南山阿時議徒紛
紜其如珪璋何

白日匿大谷驚風飄無時猛虎前噬人玄熊咆
聲悲悵彼遠行子嚴霜履嶮巇朝征褻芻糲日
晏不知疲問客何方來王事有程期結髮事明
主捐軀誠不辭羣龍翔天路皇風肅以夷樹澤
周荒裔蠕息咸熙熙奈何彼行客歲晏恒苦饑
上天垂末光白骨銜恩私

漢武伐

軍聲蜚入垓遂令雞鹿塞萬里無

塵埃漢道豈不盛運有興衰當其中葉時雄

畧莽摧顏李廣恒數奇失落空徘徊馬邑竟無

成東市棄王恢李陵負英風仗劍臺飲血

苦百戰悲風從天來志欲吞狼望輕謀貽禍胎

一旦隴族沉徒興壯士哀

楚楚繁華子出入銅龍門綢繆蕭貢交肝膽金

張援豪舉傾里閭影纓服華軒廣庭一流盼咸

稱國士恩鼎鼎百年盡身名復奚論東海魯連

手拂衣笑平原寂寂張仲蔚蓬蒿日滿園當年
既無管世遠道彌尊春華豈不艷不如樹蘭蓀
秋風豈華屋零落馨香存

燭籠騰遐輝離照亘天衢室隙受餘光徒能耀
一隅物理固殊鑒各隨賢與愚楚客倒滄海提
攜得明珠重寶不見賞抱價增煩紆掩袂臥空
谷孰知中所須

逸士慕同調自昔有求羊尚子志遯棲禽慶與
翱翔川谷莽經復阡陌亦相望歲晏耕獲餘田

父爲舉觴念彼素心人盈盈天一方倦翼思弭
林悲鳴戀匹行緯蕭與貨藥毋乃揚孤芳斯人
今則違侏侏係申此章

至人襲氣母所食唯沆瀣朝衡暮華嵩神遊八
區外遺言庶可詮至寶良在內一氣中夜神德
門貴虛待廣成說豈誕鴻寶術斯在誰其齊死
生斯理或不昧

昔游黃金臺酒酣臥燕市哀歌傍無人泣下擊
筑子忝谷生悲風易水何瀾瀾豈無英雄者翻

覽霸圖恥白日忽復易脫冠藝枌梓良觀邈山
河撫劒中夜起

南州桂冬榮先民嘉炎德明珠貢彤庭翡翠生
顏色淑往化斯竭物變胡叵測苦桃雜馬蘭中
路叢荆棘壺蜂飛螫人沙蟲巧爲射茫茫煙波
委回風蕩鰲極智士多苦懷觸覽熱中臆河漢
無津梁奮飛歎奇翼

美人洵無度山川險且深輕輶前導翔輜乘從
湛湛結華樹申椒菌桂藹成林羅幃掛曲瓊寶

懸流哀音道阻莫從之因風托微吟白璧欲投
誠青鸞驚我心愧無黃鵠翰空悲商與參袖中
金錯刀遲回歲將陰因思湘妃歎重華不可尋

又

槐嶺光熊熊崆峒山列丹樹中有神僊人乘鸞駕
烟霧明霞結爲裳玄玉琢爲宇方與三辰游豈
復計寒暑鸛籠棲鳳鳥局促鍛其羽放神凌八
荒將與斯人遇

七言古

湖口夜泊聞雁

北風夜泊蘆花渚
蓬底青燈雁啼雨
水宿雲翻路幾千
更闌月落知何處
風塵瀕洞誰非客
憐汝南飛霜霰隔
哀鳴却似畏繒繳
場翅胡能傳尺帛
嶺樹重重是故鄉
故園諸弟日相望
寒宵聽汝應欹枕
兩地相思竟夢長

燕京俠客吟

翩翩俠客出燕京
長筵廣宴羅簪纓
艷姬呈趙

舞少女擅秦聲庭前萬樹鶯花明眼看世事鴻
毛輕百遍飛觴歡未足半酣更進伊涼曲嫣然
一轉開心顏却嘯艸玄謾幽獨楊花亂撲鸕鶿
裘誰能不飲空自愁醉來拔劍起自舞天邊斫
斷黃河流不肯歛衽事七貴不學低眉謁五侯
向天長歎振林木俯仰今古皆浮漚萬金築成
走馬埒盡道繁華人共悅昨日車騎游如龍今
朝桃李飛成雪桃李飛飛黃鳥哀酌酒且上燕
昭臺憶昔燕昭下士日高談霸畧吞九垓郭隗

當師位樂毅抱奇來黃金銷歇威稜失千載雄
圖安在哉又聞鄒衍生挾策事豪舉矯首聊將
玉律吹茫茫寒谷生禾黍莫言造物不可期人
力回旋有如許今人古人不相待行樂莫使朱
顏改志何苦而隱南山憤何深而蹈東海有霞
不堪冷有芝不堪採俠客豪來還自吟長風日
暮吹蘭茝

文泉爲梁少傳作

若家舊住文泉側泉水泠泠龜莫測紋蹙三春

蘋葉風波連一道桃花色天畔爲河跡不同人
間到海情無極望中時見白霓飛深處恐有驢
龍瞿瞿君生來文藻雄寤寐猶在泉水東尋源
解識先世事臨淵遠慕古人風君不見崑崙四
水名神泉轟雷噴雪翻層顛珠光瑤屑紛紛落
時有僊子來翩躚又不見玉膏之泉味如酒沿
洄迥是羣真有金闕銀宮俯上遊飲時億萬八
千壽廼知天下之水多靈奇寄語世人何用疑
惡焦猶苦淇濤灌大壑獨有苑風知泝玄溟秘

那能已萬派千流無盡期君雖夢繞泉水上吞
若滄溟窮蕩漾乘槎上漢路非遙擊楫中流情
更壯我昔滄浪理短簑蹴躡風塵今奈何垂釣
何年向泉水爲君且作文泉歌

虹澗採蒲歌

一徑入松筠千秋餘洞壑雲氣相縈環山光自
迴薄巖前泉水涓涓流石上松子紛紛落就中
幽景何最奇百丈銀虹下寥廓銀虹灑落散明
幾菖蒲九節當春肥靈根奇卉不易得吾聞仙

客持療肌憶昔安期生
食蒲得道凌空飛至今
玉舄遺山下往往神光橫
翠微我本山中人石壁爲窓雲作扉
一望僊風幾延佇摘蒲飲澗披雲霏
行尋僊子上昇處滿地落花掃不去
澗道陰陰山鳥啼恍惚似聽山靈語
山靈嘯我非仙才安期去後誰復來
王烈洞章歎不識空餘石髓生塵埃
手把菖蒲花長嘯拂衣起蓬萊一謫
今幾秋世人視我尋常耳我昔驂鸞遊
太清金闕瑤宮相對起玉女授我東方桃
金童食我韓

衆李五芝三秀尚不論
况復菖蒲那足比此日
飡蒲憶太清服食何年
羽翼成會須共約安期
子霧蓋霓裳朝玉京
菖蒲正堪食採蒲還歎
息仰招黃鶴鶴不來
萬壑寒嵐生暝色蓬萊
咫尺不須愁玉禾朱
艸當親植君不見安期
生東海初來人不識

送梁少熙南還兼寄懷思伯

去年君自鄉園至
雪夜對談如夢寐
送君此日玉河西
楊柳絲絲黃鳥啼
人生踪跡安可常
且

向燕市傾離觴狂風吹我鄉心去樹繞關河愁
更長愁亦不足道別亦不足惜看君骭髀非凡
姿腰間寶劍蛟龍飾人生富貴等驚塵世上機
關徒刻棘請看錦繡廟中犧何似飄飄雲外翼
去矣風烟難重陳得失何須掛胸臆浮山道人
冰雪顏白日揮塵來人寰夢中曾寄相尋處生
綃一幅圖秋山燕越迢迢離別久別後新詩料
千首暫脫荷衣媿爾閒碧桃花發相思否

鼎同年陳子憲卿

陳琳才莫敵投我郢中吟客舍悠然獨披玩能
使清風生我襟陳君本是南嶽奇連城照乘重
當時筆間解掃烟雲氣海內爭看鸞鳳姿古來
楚國多豪彥風流文藻生光炫景差宋玉已寂
寞崔什羅含俱不見事往無嗟作者非只今又
識陳君面十載讀書雲夢澤一朝獻賦金華殿
天子臨軒賜顏色詞場投筆齊嗟羨登龍君已
擅芳名附驥予慙接歡宴懽宴相過帝苑東
長條短條花並紅絲毫夜賦顰毬月錦勒朝嘶

楊柳風與君相逢恨不早握手相看卽傾倒顯
詩正值好春時論交况復長安道綠綺那能吟
妙音青尊且共開懷抱許身稷契何慷慨努力
班揚看揮掃梁棟須爲大厦求珪璋終作明堂
寶我本烟波漁釣儔一出風塵空浪遊東山高
臥敢自許北闕上書今見收結廬夢憶山中桂
采藥心懸江上洲戀闕思親情共切忽誦清詞
消我愁如君高誼古無有瀝膽披心憐獨厚嗟
我虛拋竹籜冠看君早曳桃花綬青霄比翼昔

同飲黃金結交世應醜人生會合自有時按劍
當年悲白首芳草淒淒春已過送春更有新詩
否

懷羅浮吟

長劒欲倚崑崙丘深杯欲吸滄海流古人意氣
徒爲爾今人局促隨犧牛我生胡爲苦百憂三
湖卜築仍淹留側身天地箭滿眼令我東望懷
羅浮此山往往精靈聚朱明耀真通十洲七十
石室二石樓鐵橋虹起陵炎陬地脉潛連洞庭

口天臺下瞰溟渤頭九陽倒掛扶桑折朱光反
射巖巒幽軒轅纔及熊相返大禹九山封卽休
惜哉神聖跡不到秘訣隱文如可求憶昨夢遊
青岩堯天雞亂號日生潮鯨魚東來觸山動星
斗破碎隨波漂羽衣金節排風下或騎麒麟坐
次寥白榆歷歷手可摘朱鳳嗷嗷同見招自言
洞壑長爲主烟霞萬古堪逍遙覺來失却飛雲
頂天樂隱隱離叢霄搔首僊人不可逮桃李麻
源幾千載東池萬壑西飛鳥乾坤莽莽誰相貸

道開室已蕪葛洪井何在金光石髓不遇人一
望僊山幾悲慨北有恒霍東海岱嵩華衡巫俱
域內淩風直上倒景臺我欲因之淦沆瀣

霜夜樓中聞笛有感

醉倚高樓望明月天河無梁正愁絕忽聞橫笛
起天涯吹落江梅滿城雪往者北上黃金臺明
月歌殘胡笛哀數聲啾吒關榆折大野無人鐵
騎來畿輔瀕洞心膽摧天地慘淡忽異色吁嗟
此聲胡爲哉自後乞身南國臥悲歌苦調何人

和哀絃豪竹徒聒耳海思雲情獨無那此夜聞
笛神揚揚星斗闌干霜暗墮曲飛碧落雲不流
響入空山石應破山鬼悲吟萬木震蛟龍吐沫
洪濤簸東家蕩子倚筇篻南國佳人梳倭髻聽
此應復爲感動况乃志士多坎軻懷人永夜頭
堪白感舊當年計仍左聽餘三弄月東出攬衣
復向藜床坐氣酣酒盡天宇晶人間憂樂何鎖
鎖丘仲季長不可作後來賦者徒么麼我聞東
南產箭藁風稍露篠簞鸞鳳過擬裁數節手中吹

獨向寒江放孤舸

秋風行送同年柯正之之任晉都

秋風嫋嫋起燕城千樹萬樹涼蟬鳴山川蕭瑟
鴈南度客子當歌空復情更聞鹿塞馳胡兵旌
頭未落太白明羽書夜入蒲萄觀鐵騎朝屯細
柳營對此感慨那能平况復客裏送君行憐君
素負出羣材一尊岐路重徘徊空山落日意自
遠拔劍驅車何壯哉金陵樓閣倚天開到時知
眺鳳凰臺莫忘薊北烟塵日中夜遙應望上台

蘭汀存藁卷之三

梁有譽著

五言律

送業師泰泉先生赴任留都

曳玉趨鵷署鳴珂入鳳城
雲隨珠履集花傍綵衣
明學海摘文教詞園振雅聲
還瞻承睿渥六寓仰昇平

畫鶴移江滙文虹貫斗躔
青宮思羽翼黃閣待忠賢
事業雲霄上聲華日月前
懸知多實錄石

室秘瑤篇

謁梧窓先生祠

廟宇崇前哲儀刑肅後來淒清瑤瑟在想像絳
帷開海岳標芳躅雲霞煥綺才惟憐薦蘋意懷
仰獨悠哉

秋月

誰言千里外光景每相從且看一輪內山河自
幾重透林驚曙逼鋪砌訝霜濃藥闕春風好仙
槎何處逢

豐城道中

風烟杳無際孤棹去悠悠多病長爲客思鄉況
屬秋樹圍平野濶江湧衆山浮却望雲中雁緘
書寄遠愁

登湖口諸山

湖山廻合處吟眺旅懷清偶會高深趣因知魚
鳥情江帆隨雁過島樹入雲平明發自茲去看
山又幾程

清源山房爲晉江石申卿

洞壑蕭陰陰幽居詎可尋松筠閱世古雞犬隔
雲深塵滿床頭易風鳴壁上琴知爲蒼生出那
能甘陸沉

高人卜築處山水寂無喧散帙夜焚藹帶經時
灌園窓中列巖岫原上種蘭蓀睠此多幽曠空
憐微尚存

山氣日氤氲冥心謝世氛新成子虛賦閒著太
玄文松靜鶴歸晚山空鸞嘯聞超然不可企遙
睇東山雲

雅志在林壑高齋常晏如看鳬羞汜汜夢蝶覺
蘧蘧洞有大羅客山藏小酉書憑君話風景何
似上皇餘

夜宿雞鳴山寺

獨宿山齋裏空林殘雪明風泉宜客聽江海動
離情罷磬棲禽起開門落葉平無生如可學從
此脫塵纓

江上望五老峯

停艫傍曲渚試望匡廬岑霞生七嶺秀日落三

湖陰蒼島龍朝出青厓猿夜唼攀蘿不可卽結
桂愁余心

舟次胥江悵然有恍別之作

鳴榔曉漲後掛席水雲鄉樹繞江流曲天隨客
路長懷鉛慙適洛挾策異遊梁怪爾南來雁翩
翩故作行

秋日越臺登眺

越臺枕郊郭吟眺喜逢秋山向庾關斷江從鬱
水流菊湖荒蘚沒花塢夕陽愁極目鴻圖外蒼

蒼雲樹浮

南國新秋至憑高憶所懽
欲裁芳杜曲遙寄碧
雲端落木城邊暮孤鴻天際看危岑一以眺滄
海正漫漫

詠鏡

神工鑄金液揚彩秦王宮
菱花秋不落冰魄照
逾空鵲起瑤臺上龍盤寶匣中無嗟形影隔皎
潔與心同

與林邦陽夜話

旅館時相訪
憐君情最親
明燈話鄉土
把酒歎風塵
雁叫霜來早
鳥翻葉墮頻
誰知今夜裏
同是憶歸人

送吳山人遊北岳兼謁舜澤蘇公

爾作西京客
還尋北岳遊
黃雲經紫塞
白髮憶丹丘
久謝區中累
行參幕下籌
懸知登覽罷
長嘯拂吳鉤

畬皇甫稽勳子循

飛雲傳麗藻
披霧協深情
宦覺潘郎拙
人憐謝

客名折麻今日意汗竹幾時成對此芳春色無
嗟白髮生

秋日遊山時約同遊者不至

白社期空阻青山我獨尋看雲因出谷聽鳥謾
披林索莫知秋意清幽得道心忘機信所適松
下且長吟

喜雪

同雲蔭四野瑞雪下層霄遠自龍沙度紛疑兔
苑飄幽蘭會共曲黃竹謾傳謠佳此豐年象皇

宵格帝堯

石申卿挽詞

一辭京國去策蹇意如何獻壁淚還在沉珠恨
不磨旅魂隨露艸生計盡烟蘿嗟爾清源下穉
風山鬼歌

萬化終有盡如君獨可傷途窮人共惜命促志
空長白鶴歸何歲青蠅弔異鄉愁魂招不得幾
欲問巫陽

鬱鬱青霞志冥冥玄壤悲聚螢生獨苦夢蝶去

何之山雪開尊夜江波共棹時山陽隣笛賦千
載動愁思

四溟山人往邊郡出詩相示有感

行行到邊郡白首氣何豪馬上橫修槊風前看
寶刀遙聞徵虎旅謾道識龍韜籌策何年獻長
歌心獨勞

早春同李于鱗王元美華巖上人庵訪謝

茂秦

偶訪高人至開門松雪殘春光到薜蘿客况寄

旃檀白髮風前短青山江上寒東歸定花發誰
共把杯看

雙林喜金過謝客近如何散帙山雲入攜筇野
色多緇塵凋鶴望滄海問魚簑暫此松間酌春
風一放歌

于鱗子與子相元美過訪共懷謝山人茂
秦

三年臥燕市幾月隔漳河漢署詞人憶王門病
客過乾坤信短褐歲序送酣歌他日盧敖杖嵩

丘訪薜蘿

如何千載意不見一書廻白日風騷短青山鬢
髮催世情終汨沒賢達幾蒿萊狂憶羊何侶應
登銅雀臺

宇宙何寥濶斯人窮至今交遊四海意去任百
年心兔苑跡空在鹿門期可尋詞源甘許拙衰
白况知音

把酒情猶昨風塵路渺漫交深任朝野名重有
餓寒花鳥愁邊賦山川亂後看西園幾游眺景

物豈長安

離別誰堪惜艱危共愴神
白鷗江海狎玄鳥歲時頻
地迴韓陵暮天空漳水春
無爲岐路泣老至逐時人

過清遠江日

斷靄迷青嶂寒湍滾白沙
地荒空置戍城古尚棲鴉
今昔殊瞻眺江山感歲華
壯遊良可賦擊楫思無涯

江上望匡廬

聞道匡君宅神蹤不記年
先春靈艸長入夜聖
燈燃燭憶千株杏空餘五色烟
終然脫塵網來
誦綠苔篇

秋堂夜集聽雨

岸幘坐清夜冥冥山雨過微涼生
密竹急響亂
衰荷卽事易成感會心寧在多
不須憐骭髀客
醉且狂歌

山雨晚仍急虛堂秉燭看星河
秋影斷巖壑夜
聲寒粉署終何補金尊幸不乾
西風悴百卉誰

與采幽蘭

息心聊掩徑池竹澹孤清藥裹逢秋減詩篇慙
夜評倚樓寒雁過燒燭候蟲鳴幽意惟君會烟
霞莫負盟

新秋寄懷友人

高柳自鳴蟬秋風急灑然擬尋東海釣聊就北
窓眠芸架有遺帙草堂無俸錢物情關百慮轉
覺愧前賢

相思歲華晚相望海雲深明月青山夢秋風白

石墮軒窓倚桂樹道路入楓林遙想梅花下
翛然獨抱琴

歲暮集黎惟仁紫芝山房

雲木自蕭疎何慙大隱居雨殘三徑菊塵滿一
床書開戶鳥聲過移尊竹色虛滄江復歲晏誰
念病相如

梁思伯雨青樓對月得風字

詞客感秋風登樓望朔鴻移尊山月上捲幔海
雲空世事狂歌外交情痛飲中佳期不易得况

對菊花叢

遊羅浮阻風大唐田舍

曾聞漢鮑靚海上阻秋風我亦羅浮去飄飄烟
雨中魚龍舟子懼雞黍野人同暫憇茆簷下滄
洲興不窮

海色莽空濶江邨何寂寥田家具燈火野客候
風潮淅傍丹楓宿應期黃鶴招如逢葛仙令知
我狎漁樵

送譚友人南歸

譚生湖海士長鋏賦歸來燕市當春別江帆幾
日迴宦情真自拙鄉思若爲裁爲問山中桂秋
風應復開

過金溪石觀望絕頂

江瞰龍宮迥藤懸鳥道賒蒼厓秘玉波丹壁走
金蛇去似尋源客入疑上漢槎還瞻九霄上應
有五雲車

五言排律

寄梁仲登兼訂遊山之約

作賦聲何早，憂時意獨迷。
君應徇監薦，吾擬鹿門棲。
埜樹連愁暗，江雲逐望低。
避喧窺鳥過，憶遠怯猿啼。
溟海一書札，秋山幾杖藜。
風塵還白社，歲月謾丹梯。
玄艸心從苦，黃華手阻攜。
橘洲斜日裏，茅屋斷鴻西。
谷口隱真得，豪梁樂與齊。
茹芝能不薄，靈岳共扳躋。

詠秋雁

朔氣正淒淒南飛路不迷聯翩高柳北搖曳上
林西薄霧行時斷穿雲影乍低不愁霄漢迥自
顧羽翰齊風急還雙起沙寒不獨栖堪悲覆笥
者相向繞湖隄

賦得臨池柳

拂斫青陰合縈堤翠色稠聲從笛裏聽影傍鏡
中浮水與柔情漾波將舞態留腰肢憐楚細眉
黛學孫愁濯濯恒籠霧依依詎奈秋堪憐張緒
去誰復擬風流

峽山飛來寺

碧流環黛壑琪樹隱珠宮
佛影諸天近空香下界
同懸峯吐日月古壁淡烟虹
開鑿元神造飛棲歎鬼工
雲屯山欲墜潭靜水恒空
勢倚乾維外形盤地軸東
覺花常捧露忍艸自含風
寶筏迷川迫金繩慧景融
八平明淨業七滿表慈衷
聽法趨鮫女傳經侍海童
日城虛不昧星劫運無窮
塔湧青冥外輪浮色界中
人寰三島近天路十洲通
鰲岫攢雕拱蓮厓暎綺櫳
冥搜情詎

已遐覽意何雄
僊客淩靈壑
羈人歎轉蓬
玉毫如可照
於此脫塵蒙

妙高臺謁蘇文忠公像

長公不可作
遺像見丰標
臺接丹丘月
門臨滄海潮
一官空白首
十載爲青苗
玉簡芳名紀
瑤編綺思饒
感時真慕賈
著論每凌晁
伊昔金蓮遇
何年斷梗飄
投珠人其惜
毀壁禍難銷
舊蹟嗟夷漫
荒祠更寂寥
砌閒衰草積
牖暗暮雲飄
哀些難成調
忠魂詎可招
丹青猶藹藹
松檜已

蕭蕭漁火連江暗
霜鐘振壑遙
旅懷多感激
行矣寄長謠

題橫涇草堂

吳中有高士
家傍具區潯
水石娛幽趣
圖書諧素襟
披軒山翠入
頰檻海雲深
自愛愚名谷
脩然竹作林
興來時命翰
賓至或彈琴
有道還同昔
懷材諒在今
霧深聊豹隱
風迥更鸞吟
玉樹爲家寶
瑤華是國琛
佇看朱紱貴
寧遂紫芝心

送同年黃亭夫宰宣城

茂邑今爲宰春風此送行
離筵看柳色立馬聽鶯聲
霄漢期勲業風塵念友生
把杯情獨切贈策意非輕
此日辭燕甸何時到楚城
山標敬亭勝水寫宛溪清
謝朓詩無敵江淹賦有名
昔賢嗟寂寞才子繼崢嶸
製錦休聲遠彈琴美政成
天邊鳬舄去日下鳳書迎
久客卽堪別臨岐祇自驚
飛騰萬里志聚散百年情
努力崇芳績遲君翊聖明

喜雨

朱明始戒節旱魃勢方隆麥隴嗟民瘼桑林軫
聖衷瑤壇卜禋祀玉署肅羣工香滿三千界靈
祈太一宮明星歆紫極甘澤降玄穹灑自嚴城
北飄從禁籞東濯枝初泚瀝觸石轉微濛灌漑
三陔合歡呼萬姓同薊門山色淨榆塞戰塵空
樓閣青溟外川源決滌中雲藏苑樹綠花泛御
溝紅細涇王孫草輕翻少女風烏皮微潤上鶴
氈暗涼通有道占天貺無能喜歲豐子桑歌正
澁謝客句徒雄忽動山中興清霄憶桂叢

宗子相宅

燕嶠正人日朋簪復此筵青尊其良夜練勝感
流年北地寒應減上林春較先雁歸殘雪後梅
落晚風前世事嗟知白吾生謬守玄愁深詩艸
短興洽燭花燃官闕祥光滿郊原景色鮮更期
恣遊賞莫負艷陽天

喜歸述懷畱別李于鱗徐子與宗子相王

元美四子一百韻

天地炎州外雲濤漲海邊爲儒嗟世業結社斷

塵緣鬢亂超先子榮枯憶往年時推驄馬使人
避鐵冠賢吳越歡奔走江湖獲泝沿沙蟲讒倏
及野鵬禍翻纏菊落哀霜徑松寒泣露阡承家
悲蹇薄生業苦憂煎寂寞誅茅地荒涼種秫田
文章愧作者丘壑擬終焉野市山珍集江橋海
錯鮮歲時聊汨沒形役謗拘攣北海樽虛倒東
山屐屢穿敝囊緘綠綺故物惜青氈拙自甘鶉
服貧還蓄蠹編年華驚似箭世事歎如弦早已
輕衣食其如因槩鉛賈生元起洛郭子遂遊燕

射策終何術公車獨未捐茂才叨辟選上國接
周旋帝業雄豐鎬祥基陋澗瀍紫宸清佩侍赤
縣瑞珪聯開闢天人合中興嶽瀆金扼關分虎
竹踰嶺貢龍涎豪俠傾畿內聲明暨海壖烟花
春浩蕩車騎日喧闐公子廻金勒佳人拾翠鈿
風塵驅匝匝時節出鞅韃盛極人情異憂來物
態遷中秋入虜騎內郡卷戈鋌豈謂建瓴地俄
驚飲馬川軍聲摧戍已災變動璣璇讎恥誰嘗
膽承平祗控拳士奔綿帟破胡舞粉麴妍氣槩

吞三輔憂疑盡入堦射生羣騾裹送酒泣嬋娟
天鑒扶靈祚皇威赫怒權殿前籌不少聞外略
誰專俄覺胡宵遁潛窺將晝跽穹廬充子女宇
宙厭腥膻資弱山能負禽微海欲填傷心見黔
首感舊問華顛廟算時方倚天驕惡詎悛瘡痍
未蘇息戈甲轉絲延增賦梯航湧徵兵郡國連
歲輸海陵粟日費水衡錢不見飛黃至空嗟太
白懸西南猶戰壘春夏更烽烟大將持牙纛孤
兒跨錦韉謀臣詫舌在重鎮棹省燃瑞檢張天

步妖氛襲斗躔時難同闕室國計坐臨淵慟哭
看中土哀歌仰上乾謨猷楓陛切祀典竹官虔
寸勇俱收錄微才盡採甄幽人心耿耿烈士涕
漣漣華省陪持戟塵途競着鞭賦慙狗監薦官
冗馬曹員法網徒苛屑刑書祗痛悃凝脂誰合
解刻木便應蠲結鞶聲何藉含毫意獨堅長楊
千載意汗竹幾人傳詞賦堪哀矣交游敢泛然
徐陵同握管宗慙對談玄抗節還元禮憂時實
仲宣開軒頻促膝授簡不虛筵藝苑宜藏氣名

家愧比肩尚書期不顧國士意相憐句逐法曹
得狂隨吏部眠論心各磊落附尾喜翩翩事業
浮生外衣冠薄俗前蘇門應避地杞國謗憂天
具客思尊鱸騷人詠蕙荃物情增慘淡吾道合
迤邐鴻雁何方別蟾蜍幾度圓材迂五石匏心
慕九疑蓮咄咄懷虛積冥冥志孰詮潘輿伏臘
喜姜被夢魂牽性僻甘人後愁深讓隱先乞身
頻疏上辭職荷恩偏詩興行豪甚交情去勉旃
潛鱗終放蕩健翮任騰騫勳烈旂常重聲名琬

琰鑄猖狂終歲是消渴幾時痊多病成吾懶無
才免世愆寧能念婚嫁且去弄潺湲心賞同寥
廓羅浮愜靜便峯巒窺四百世界俯三千天入
金沙洞烟飛鐵柱泉松蘿亦嫋嫋石瀨故濺濺
獨鶴凌星嶠羣真下霧輶形骸原土木景物自
茅椽葛令還成藥曹溪更悟禪遙探小酉藉閒
訪大羅僊幻妄蒙蕉鹿清虛飲露蟬世情付濁
酒朋好共清絃五嶺雲隨杖三江月送船臨岐
淒把袂相憶料揮篋聚散非人意襟期失俗筌

乾坤一俛仰長詠四愁篇

西園雅集爲 趙王作

魏氏富文雅鄴官常譙遊賢王開邸第異代繼
風流地卽三臺舊人疑七子儔影纓俯漳水散
帙對嵩丘珍木環書閣僊禽去畫樓開尊明月
夜授簡白雲秋景物寥中勝烟霧象外幽竹園
空讚述桂樹謗淹留奕葉屏藩重宗支禮數優
清時多賦誦况廼集應劉

送陸子韶使南

星使出西署行行劒氣雄青驪踏穩草蒼隼擊
霜空吳楚寒雲外關山夕照中旅程隨白雁鄉
露隔丹楓憂國情應切悲秋意不窮士衡有詞
賦早晚寄江東

送張肖甫之官滑縣

相送滑城去人歡得茂先艱危希令宰經略賴
時賢地勢九河會風光三輔連丁男方築塞甲
士欲防邊土俗嗟勞止登臨幾慨然聽鶯到花
縣駐馬問桑田遙拂衝星劒閒揮流水絃君才

堪製錦吾意謬思玄倚玉慚多拙投珠貴自全
鷦鷯應有賦鴻雁早須傳

仲冬朔日修復山中舊社得寒字

白社何年別青山此日看風塵雙鬢短江海一
尊殘猿鶴驚人去松筠掩徑寒馬卿遊獨倦羊
仲過同歡帙向風林散琴迎露菊彈幽居知節
換拙養見交難今古徒蟲技乾坤自鵬冠登樓
其詞客踈豁望飛翰

秋夜山樓對月與黎惟敬梁思伯諸君同

賦

月上江城夜人悲故國龜關山寧改色今古自
生愁玉露蕭蕭下金波澹澹流霜鐘飄大壑風
笛倚高樓棲鵲還無定賓鴻各自求詩題桐葉
晚杯就桂華秋兵氣纏中土僊期阻十洲暫爲
鴈鴒舞莫問鸛鸛裘詞賦誰青簡勳名易白頭
物情空鹵莽朋好且綢繆顧兔終虛搗蟾蜍亦
浪遊因風訊靈魄茲夕可淹留

閒居漫述

大雅悲前代虛懷任此生長楊空有作小艸竟
何成窮歎臝藏技才憐雁善鳴江湖風物改容
髣壯心驚自昔倦持戟於今羨濯纓風騷情屢
感山水意先傾野飯供菰米幽居葺杜衡忘機
知鳥性取適聽泉聲露井猶飄葉霜籬自落英
長鑱爲歲計短褐謝時名永日香增蕤清宵茗
續烹購書無積俸閱史有新評擾擾哀時事悠
悠見物情虎頭痴獨絕龜手術徒精祗益交期
若難忘世網嬰願逢調玉燭詎意賜金莖間就

君平卜沈思孺子耕仰賢慙竊祿對客厭談兵
達士還觀妙玄風豈在羸河濱能授道柱下戎
持盈仙與食霞法僧尋住嶽盟高秋望雲物終
作十洲行

喜梁李二山人入社

騷壇稱二妙名自早年知磊落看前代飛騰羨
此時黃初窺製作綠綺共襟期浪跡猶存古高
談亦解頤賦才愁裏逸俠氣醉來奇霜下梅花
詠風前桂樹詞握珠君自惜投璧我無疑南國

空舒笑東方謾歎饑古人何寂寞吾道豈磷緇
秉燭星垂戶開尊竹蔭池藥闌齊染翰花塢半
彈棋更擬持竿去長歌滄海湄

送沈惟順戶曹北上

爲問淮南士何如沈隱侯三墳看繡籍八詠見
風流花憶上林日鳬飛炎海秋驅雞才獨展馴
雉效全收夙繫蒼生望能寬白屋愁新恩持戟
貴舊俗攬車留泗水懸情劇燕雲滿目浮行無
陸賈橐去有李膺舟亂後趨庭意時來報國憂

人方輕楚調君獨佩吳鉤四海猶傳箭千官擬
借籌握蘭知思苦起草見深謀名向駕行重功
從麟閣求周南留滯者相憶倚江樓

觀音閣望海上諸山得城字

紺閣幾臨眺翛然出世情僧無說蓮偈客有聽
松聲海澗衆山小天空萬籟鳴沃焦何縹渺員
嶠自崢嶸樹入窮荒盡峰銜元氣平暝烟沉大
野寒磬落孤城下界悲塵劫空門悟此生青尊
聊一醉何必問蓬瀛